

▼02/11/18-37MST
U GB 02-11 00167 BA251
aah

Mahathir - Ekstradisi
EKSTRADISI RAJA BAHRIN : KBRAJAAN TOLAK PERMOHONAN AUSTRALIA ..

KUALA LUMPUR, 2 Nov (Bernama) -- Permohonan kerajaan Australia untuk mendapatkan perintah ekstradisi terhadap anak saudara Sultan Terengganu, Raja Kamarul Bahrin Shah, telah ditolak, kata Perdana Menteri Datuk Seri Dr Mahathir Mohamad hari ini.

"Saya telah dinasihati Peguam Negara dan Kementerian Dalam Negeri bahawa tiada asas bagi kerajaan untuk menerima permohonan itu," katanya ketika ditanya pemberita di sini.

Beberapa bulan lepas, Australia, yang tidak mempunyai perjanjian ekstradisi dengan Malaysia, memohon supaya kerajaan membenarkan Raja Bahrin diekstradisi ke negara itu untuk dibicarakan di Mahkamah Keluarga Australia.

Permohonan yang dikemukakan Menteri Luar negara itu, Gareth Evans, bertujuan untuk membolehkan Raja Bahrin dibicarakan terhadap dakwaan "melarikan" kedua-dua orang anaknya, Iddin dan Shahirah, daripada jagaan bekas isterinya, Jacqueline Gillespie.

Dr Mahathir, yang juga Menteri Dalam Negeri, berkata beliau sudahpun menandatangani surat menolak permohonan itu baru-baru ini berdasarkan nasihat Peguam Negara dan Kementerian Dalam Negeri. -- Lagi.

▼02/11/19-14MST

CNS7724
U GB 02-11 00167 BA253
aah

Mahathir - Ekstradisi 2 (Akhir) Kuala Lumpur

"Saya sudah tandatangani surat itu dan menyerahkan kepada Kementerian Luar untuk menyampaikannya kepada kerajaan Australia," katanya.

Baru-baru ini, Menteri Undang-undang, Datuk Syed Hamid Albar, berkata perintah ekstradisi hanya boleh dibenarkan jika seseorang itu terbukti melanggar undang-undang negara yang membuat permohonan dan kesalahan yang dilakukannya juga merupakan satu jenayah di negaranya sendiri.

Sehubungan itu, Syed Hamid berkata, Dr Mahathir mempunyai dua pilihan untuk menilai sesuatu permohonan ekstradisi iaitu dengan menggunakan budi bicaranya selaku Menteri Dalam Negeri selepas meneliti semua peruntukan undang-undang atau menyerahkan kepada mahkamah untuk membuat keputusan.

Terdahulu, Perdana Menteri yang juga Presiden Umno menemui kepimpinan Umno peringkat bahagian dari seluruh negara menjelang Perhimpunan Agung Umno Khamis ini.

Pertemuan itu merupakan tradisi Umno bagi membolehkan presiden parti bertemu dan menasihati para perwakilan sebelum perhimpunan agung.

Esok, Perhimpunan Pergerakan Pemuda dan Wanita Umno bermula diikuti Perhimpunan Agung Umno selama tiga hari. -- Bernama.

AH NMO

▼02/11/19-10MST